

Otro incidente na WEB:

‘Ta haci test pa wak kico a causa morto di piscanan’

ORANJESTAD – E causa di e morto di piscanan den e awa na WEB e siman aki, ainda ta keda sin explicacion. WEB ta haci test pero mester manda esaki pa laboratorio na Merca.

Ta di dialuna caba cu e planta a nota un cantida di pisca morto na e entrada pa awa pa fria turbinanan. WEB a tuma muestra di e awa di lama den e area y a confisca algun di e piscanan morto. “Debi cu no por haci e testnan necesario na Aruba, a manda e muestranan pa un laboratorio mundialmente renombra na Merca. Lo dura algun dia pa haya resultado.”

E compania ta enfatisa cu no ta trata di e entrada pa awa pa e planta pa procesa awa di bebe, sino e entrada pa awa pa fria turbina. “Tur test di e awa di bebe di WEB te awor ta dentro di e normanan pa awa

di bebe y pues safe pa bebe.” WEB ta haya ‘comprendibel cu ta reina un preocupacion pa nos awa di bebe’. Pero kier aclaria cu ta haci test regularmente di e awa na puntonan ‘strategico’ den e planta. Tambe ta test e awa di bebe prome cu e bay den tankinan. Finalmente ta test e awa caminda e ta sali di e tanki bay den e red di tuberia.

Kico a pasa

Diamars 24 di februari mainta, tambe WEB a nota di algun pisca morto riba rif, caminda ta haciendo e limpieza di e derame cu a tuma luga dos siman pasa. “E especulacionnan pa lo cual ta e causa, ta hopi”, e compania ta bisa. Tin ta bisa cu ta e kimico cu a uza pa spula planta, tin cu ta bisa cu ta zeta di e derame, otro ta bisa cu ta algo cu a yega e entrada pa motibo di e corriente di lama. Y hasta tin cu ta bisa cu a benta pisca morto den e



entrada. Pero nada ainda ta confirma, asina e compania ta enfatisa.

Segun un experto ta bisa Bon Dia Aruba no por ta zeta, pasobra esaki ta un substancia pisa cu mester a sink caba sea plak na e coral di e rifnan of piedra of santo di suela di lama. Kimiconan cu ta mas leve, manera esun pa limpia, si por mata pisca pasobra por afecta e cuero di e piscanan. Pero esaki mester muestra di

e testnan ainda. E experto ta puntra entre otro si no a haya piscanan na e salida di e awa, Pasobra si e awa aki ta mucho cayente, e piscanan por muri tambe.

Altura

WEB ta informa cu despues cu a ruim op e piscanan morto, nan no a mira mas pisca morto. Tambe nan ta haya cu ‘participacion na especulacion no ta contribui na salud di comunidad y na medio am-

biente’. Pa e motibo ey WEB a haci e testnan necesario y ta pendiente di e resultado. Ademas nan ta haci investigacion pa wak kico otro por a causa esaki. Gerencia di WEB a pone Departamento di Salud Publico y Departamento di Naturalesa y Medio Ambiente na altura y ta keda den contacto ‘estrecho’ cu e instancianan gubernamental aki. Kico esaki ta nifica Bon Dia Aruba ainda mester puntra. □